

## Headlines

- 1 उपराज्यपाल मनोज सिन्हा होरें इक बैठक च खातर-तब्ज्जा मैहकमे दे कम्मकाज दा जायजा लैता ऐ।
- 2 गोदरेज कंपनी दे इक प्रतिनिधिमंडल नै अज्ज उपराज्यपाल हुंदे नै मलाटी कीती ते जम्मू कश्मीर च कृषि सेक्टर दे बढ़ावे लेई मौके दा पता लाने पर अपनी सैहमति प्रकट कीती।
- 3 मुख्य भरै च अज्ज आतंकवाद-रोधी ध्याड़ा मनाया जा'रदा ऐ।
- 4 जम्मू कश्मीर च रातीं दे तापमान च बाद्धा होआ ऐ ते मौसम विभाग नै जम्मू खिल्ले दे मैदानी इलाकें च खुश्क मौसम ते लूह चलने दी संभावना दस्सी ऐ।

<><><><><><>

## LG-Meeting

उपराज्यपाल मनोज सिन्हा होरें अज्ज खातर-तब्ज्जा विभाग दी इक जायजा मीटिंग दी अध्यक्षता कीतीं उपराज्यपाल होरें विभाग दे कम्मकाजें गी बेहतर करने ते राजस्व बधाने लेई लक्ष्य तैह करने लेई आखेआ। उनें विभाग दी सम्पत्त ते सैलसफा ते गेस्ट हाउस निर्माण परियोजनाएं दा जायजा लैता। उनें सैलानिएं ताई बनाए गेदे गेस्ट हाउसें, कनवेंशन सेटरें ते कांफ्रेंस सुहलतें दे बद्धोबद्ध इस्तेमाल पर जोर पाया ते सैलसफे ते मेजबानी कन्नै सरबंधत जरूरतें लेई इकै थाहर कोई हल्ल हासल करोआने पर जोर पाया। उपराज्यपाल होरें सार्वजनिक निजी भ्याली आलिएं पैहलकदमिएं दे बाद्धे विकास दा आह्वान कीता। मीटिंग च सरकार आस्सेआ चलाए जा'रदे बक्ख-बक्ख गेस्ट हाउसें दे किराएं बारे बी चर्चा कीती गई।

<><><><><><>

## LG-Sinha

गोदरेज इंडस्ट्रीस ग्रुप दे इक प्रतिनिधिमंडल नै अज्ज राजभवन च उपराज्यपाल मनोज सिन्हा हुंदे कन्नै मलाटी कीती। प्रतिनिधिमंडल दी अगुवाई गोदरेज एगोवेट दे कार्जकारी निदेशक बुर्जिश गोदरेज होर करै करदे हे ते उनें उपराज्यपाल हुंदे कन्नै जम्मू कश्मीर च अपने कारोबार सरबंधी मजूदा निवेश ते उद्योगें दे होर विस्तार बाद्धे बारे चर्चा कीती। प्रतिनिधिमंडल नै जम्मू कश्मीर दे समूलचे कृषिवातावरण दे फायदें आस्तै मौके दा पता लाने ताई बी अपनी सैहमति प्रकट कीती।

<><><><><><>

## Anti Terrorism

मुख्य भरै च अज्ज आतंकवाद-रोधी ध्याड़ा मनाया जा'रदा ऐ। एह ध्याड़ा साबका प्रधानमंत्री राजीव गांधी हुंदी पुण्यतिथि पर मनाया जंदा ऐ, जिंदी 21 मई 1991 च चेन्नई कोल इक ग्रां श्री पीरुमंबदूर च एलटीटीई दे आत्मघाती बम्बर नै हत्या करी दित्ती ही। एह ध्याड़ा लोकें गी आतंकवाद ते हिंसां दे समाज ते राष्ट्र पर पौने आले माड़े प्रभाव बारे जागरूक करने लेई मनाया जंदा ऐ।

<><><><><><>

## FFMA Rajiv Gandhi

फ्रीडम फाईटर मैमोरियल एसोसिएशन (एफएफएमए) नै अज्ज साबका प्रधानमंत्री स्वर्गीय राजीव गांधी होरें गी उंदी पुण्यतिथि पर चेता कीता ते उंदे महान योगदान गी चेता कीता ते राष्ट्र निर्माण च उदिएं अनकथ सेवाएं ते उपलब्धिएं पर लोह पाई। साबका प्रधानमंत्री हुंदे 33में शहादत दिवस दे मौके न्यू रिहाड़ी जम्मू च एफएफएमए दे दपतरै च लग्गे दे इक प्रभावशाली समारोह च उनें गी निग्धी श्रद्धांजलि अर्पित कीती गई। उत्थें मजूद किट्ट गी संबोधत करदे होई एसोसिएशन दे अध्यक्ष राजीव महाजन होरें सब्बने शा लौहकी उमरी दे प्रधानमंत्री राजीव गांधी हुदिएं सेवाएं गी चेता कीता, जिनें मुख्य दे नोजवानें कन्नै निबड़ने लेई "बिजन" दित्ता। उनें मुख्य च सूचना प्रौद्योगिकी ते टेलीकॉम क्रांति आली वोट पाने दी बरेस 18 ब'रे करियै उनें नोजवानें गी सशक्त कीता। श्री महाजन होरें आखेआ स्वर्गीय गांधी मुख्य च पंचैती राज सरिस्ते दे जनक हे ते इनें 73में ते 74में संशोधनें कन्नै पंचैती राज गी संवैधानिक दर्जा ते इख्तोयार दित्ते। महिलाएं लेई 38 प्रतिशत आरक्षण दी बत्तपट्टी कीती ते पंचैती राज सरिस्ते दिएं सब्बने त्रुं सतहें पर पट्टीदर्ज जाति ते पट्टीदर्ज जनजातीएं गी अनुपात दे स्हाबै नुमसंयदगी पक्की कीती। उनें जमीनी सतह तगर लोकें गी अधिकार इख्तोयार मुंतकिल कीते।

<><><><><><>

## Film Shooting

अभिनेता जैकी श्राफ होरें जेह्दे अज्जकल फिल्म "सिंघम अगेन" दी शूटिंग च मसस्फ न, जम्मू कश्मीर सरकार दा फिल्म उद्योग दे व्यवसायिकें गी जेह्दे फिल्में दी शूटिंग ते दूए प्रोजेक्टें लेई इत्थें औंदे रौह्दे न, अपना अनकथ सैहयोग समर्थन देने लेई

आभार प्रगट कीता ऐ। जम्मू कश्मीर च अपनी फिल्म दी शूटिंग दरान इत्थूं दे लोकें दी मेजबानी ते मदाद दी तरीफ करदे होई, जैकी श्राफ होरें आखेआ जे जम्मू कश्मीर दे लोक बड़ा दया-भाव रखदे न ते हर मुमकन मदाद करदे न। "सिंघम अगेन" अगस्त 2024 आजादी आले ध्याड़े रिलीज होनी ऐ।

<><><><><><>

### Narsingh

अज्ज गोविन्दसर कदुआ दे नरसिंह धाम मंदरे च भगवान नरसिंह जयंति मनाई गई। इस मौके पर श्रद्धालुएं नरसिंह भगवान दा आर्शीवाद प्राप्त कीता। इस दरान इक धार्मिक जलूस बी कड्डेआ गेआ, जेहूड़ा नरसिंह धाम गोविंदसर थमां शुरू होआ ते गोविंदसर ग्रां दे बक्ख-बक्ख हिस्सें थमां लघदे होई सम्पन्न होआं आकाशवाणी कन्नै गल्ल करदे होई नरसिंह धाम दे महन्त होरें दस्सेआ

<><><><><><>

### Heat Wave Jammu

जम्मू च कल इस मौसम दा सब्बने शा बद्ध 42.2 डिग्री सैल्सियस तापमान दर्ज कीता गेआ। विद्यार्थिएं गी बड़ी मती गर्मी थमां राहत पजाने लेई अधिकारिएं स्कूलें दे समें च फेरबदल कीता ऐ। जम्मू च कल्लै दा तापमान औसत कोला 3.9 डिग्री बद्ध हा। 16 मई थमां गै जम्मू च गर्मी दा प्रकोप बने दा ऐ। हालांके मकामी लोकें बधा'रदी गर्मी गी दिक्खदे होई स्कूलें च गर्मिएं दियां छुट्टियां तौले पाने दी मंग कीती ही। पर स्कूली शिक्षा निदेशालय जम्मू नै हायर सक्डरी तोड़ी दे सब्बने सरकारी ते प्राइवेट स्कूलें दा समा बदलने दा हुक्म दित्ता। मौसम विभाग नै 28 मई तोड़ी खुश्क मौसम दी पेशगोई कीती दी ऐ।

<><><><><><>

### Heat Wave

भारती मौसम विभाग नै अगले त्रै रोज उत्तर-पच्छमी भारत दे पद्धरें इलाकें, उत्तरी मध्य प्रदेशे ते गुजरात च गर्मी दी सख्त आस्तै रैड अलर्ट जारी कीता ऐ। मैहकमे दा गलाना ऐ जे पंजाब, हरियाणा, चंडीगढ़, दिल्ली, पूर्वी ते पच्छमी राजस्थान, पच्छमी उत्तर प्रदेश ते उत्तर पच्छमी मध्य प्रदेश च इस म्हीने दी 24 तरीक तोड़ी गर्म लैहर थमां सख्त लूह पौने दी संभावना ऐ। मौसम विभाग नै अगले चार रोज उत्तर-पच्छमी ते मझाटले भारत च तापमान च 2-3 डिग्री दी बढ़ोतरी होने दी पेशगोई कीती ऐ।

<><><><><><>

### DDC Ramban

डिप्टी कमीशनर रामबन बसीर उल हक चौधरी होरें अज्ज परनोट इलाके च जिमीं घस्सने करी रामबन-गूल सडकें गी पुज्जे दे नुक्सान ते तबाह होए दे बिजली सप्लाई दे ढांचे ते सार्वजनिक सुविधाएं पर जायजा लैता। इस मौके पर उंदे कन्नै अतिरिक्त उपायुक्त वरुणजीत सिंह चाढ़क, ओसी, 52 आरसीसी, एस.के. गौतम ते दुए अफसर ते स्थानीय लोक ते लोकें दे प्रतिनिधि बी मजूद हे। डिप्टी कमीशनर होरें 400 के.वी किशनपुर वनपो बिजली ट्रांसमिशन ते रामबन-गूल सडक राबतें गी परतियै बहाल करने आले कम्में दी रफतार दा बी जायजा लैता। तोआई केई लोक ते प्रतिनिधिमंडल बी डिप्टी कमीशनर हुदं कन्नै मिले ते उंदे कन्नै अपनियां समस्यां ते मंगां सांझिया कीतियां। डिप्टी कमीशनर होरें उनेंगी त्रोहियै सुनेआ ते अफसरें गी उंदे मसलें तौले शा तौले नबेड़ने दी ताकीद कीती।

<><><><><><>

### Cultural Div. Day

इज्ज वार्ता ते विकास आस्तै सांस्कृतिक बन्न सबन्नता दा विश्व ध्याड़ा मनाया जा'रदा ऐ। एह ध्याड़ा ना शड़ा विश्व दी संस्कृतिएं दी समृद्धि उजागर करने आस्तै सगुआं शांति ते टिकाऊ विकास दे लक्ष्य गी हासल करने आस्तै बक्ख-बक्ख संस्कृतिएं बश्कार वार्ता दी भूमका पर लोह पाने आस्तै बी मनाया जंदा ऐ। UNESCO मूजब सांस्कृतिक ते नमिएं काहडें आला सेक्टर विश्व च विकास दा सब्बने थमां शक्तिशाली इंजन ऐ। एह सेक्टर विश्व च 4 करोड़ 80 लक्ख थमां बद्ध नौकरियां उपलब्ध करोआना ऐ, जिंदे चा अद्वियां नौकरियां महिला करदियां न। एह सेक्टर 30एं ब'रे शा घट्ट उमरी दे सब्बने थमां बद्ध लोकें गी रोजगार उपलब्ध कराने आला सेक्टर बी ऐ। पर फही बी सार्वजनिक नीतिएं ते अंतर्राष्ट्री सैह्योग च इस सेक्टर गी ओहदी बनकदी थाहर हासल नेई होई ऐ।

<><><><><><>

### Udhampur

महिला सशक्तिकरण दे केन्द्र मिशन शक्ति ते समाज कल्याण मैहकमे आस्सेआ कुड़िएं दे सरकारी हाई स्कूल उधमपुर च इक जागरूकता कार्यक्रम कराया गेआ। एहदा मकसद कुड़िएं गी इंदे सशक्तिकरण आस्तै दो प्रमुख चीजें-डिजीटल साक्षरता ते सेहत जागरूकता कन्ने लैस करना हा। इस मौके योग दा सत्र बी लाया गेआ जेहदे च योग दे माहिर पिंकी अत्री होरें विद्यार्थिएं गी योग क्रिया दे फायदे बारे दस्सेआ दसाया। एहदे इलावा जंडर विशेषज्ञ पूजा जम्वाल होरें उधमपुर च महिलाएं दी मदद मदाद आस्तै चलाई जा'रदी बक्ख-बक्ख सरकारी स्कीमें दी जानकारी दित्ती। तकरीबन 60 विद्यार्थिएं ते अध्यापकें इस कार्यक्रम च हिस्सा लैता।

<><><><><><>